

PROJEKTLIGJ

Nr..... datë

**“PËR DISA SHTESA DHE NDRYSHIME NË LIGJIN NR.8577, DATË 10.02.2000
“PËR ORGANIZIMIN DHE FUNKSIONIMIN E
GJYKATËS KUSHTETUESE TË REPUBLIKËS SË SHQIPËRISË””**

Në mbështetje të neneve 81, 83 pika 1 të Kushtetutës, me propozimin e një grupi deputetësh,

K U V E N D I

I REPUBLIKËS SË SHQIPËRISË

V E N D O S I:

Në ligjin nr.8577, datë 10.02.2000, "Për organizimin dhe funksionimin e Gjykatës Kushtetuese të Republikës së Shqipërisë", bëhen këto ndryshime:

Neni 1

Në Nenin 1, paragrafi 2 , pas fjalëve “nga ky ligj” shtohen fjalët “apo nga Rregullorja e Gjykatës Kushtetuese”.

Neni 2

Neni 2 ndryshohet si vijon:

“Gjykata Kushtetuese është autoriteti më i lartë që zgjidh mosmarrëveshjet kushtetuese dhe bën interpretimin përfundimtar të Kushtetutës.”

Neni 3

Në Nenin 5, paragrafi 1, pas fjalëve “Flamuri Kombëtar dhe” shtohet fjala “stema”.

Neni 4

Neni 6 paragrafi 1 ndryshohet si vijon:

“1. Gjykata Kushtetuese administron në mënyrë të pavarur buxhetin e saj, të cilin e harton dhe ia paraqet për miratim Kuvendit të Shqipërisë.”

Neni 5

Në KREUN II ndryshohet titulli “Përbërja dhe mandati i Gjykatës Kushtetuese” dhe Neni 7 ndryshohet si vijon:

Neni 7

“Përbërja e Gjykatës Kushtetuese

1. Gjykata Kushtetuese përbëhet nga 9 anëtarë, prej të cilëve 3 anëtarë emërohen nga Presidenti i Republikës, 3 anëtarë zgjidhen nga Kuvendi i Shqipërisë dhe 3 anëtarë zgjidhen nga Gjykata e Lartë. Gjyqtarët e Gjykatës Kushtetuese emërohen për 9 vjet, pa të drejtë riemërimi.
2. Përbërja e Gjykatës Kushtetuese përtërihet çdo 3 vjet, me një të tretën e saj. Anëtarët e rinj caktohen sipas radhës, përkatësisht nga Presidenti i Republikës, nga Kuvendi dhe nga Gjykata e Lartë. Ky rregull ndiqet edhe në rastet e përfundimit para afatit të mandatit të anëtarit të Gjykatës Kushtetuese.”

Neni 6

Pas Nenet 7 shtohet Neni 7/ame përmbajtje si vijon:

“Neni 7/a

Kriteret dhe kushtet e emërimit të gjyqtarit të Gjykatës Kushtetuese

1. Gjyqtari i Gjykatës Kushtetuese mund të zgjidhet shtetasi shqiptar që përmbush këto kushte:
 - a) të ketë zotësi të plotë për të vepruar;
 - b) të ketë mbaruar arsimin e lartë juridik, Diplomë e Nivelit të Dytë;
 - c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;

- ç) të mos jetë nën procedim penal dhe të mos jetë dënues për kryerjen e një veprë penale;
 - d) të mos jetë larguar nga detyra për shkakë disiplinore dhe të mos ketë masë disiplinore në fuqi;
 - dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij.
2. Kandidati që përmbush kushtet e parashikuara në pikën 1 të këtij neni, duhet të plotësojë edhe këto kritere:
- a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, nëpunës i nivelit të lartë në administratën publike, ose këshilltar ligjor i Gjykatës Kushtetuese dhe Gjykatës së Lartë;
 - b) të ketë një veprimtari të spikatur në fushën e të drejtës kushtetuese, të drejtave të njeriut ose sfera të tjera të së drejtës;
 - c) të jetë vlerësuar për aftësitë profesionale dhe integritetin etik e moral.
3. Plotësimi i kritereve të mësipërme vlerësohet në bazë të:
- a) vjetërsisë në profesion;
 - b) përvojës së veçantë të kandidatit në një fushë të caktuar të së drejtës;
 - c) kualifikimeve pasuniversitare dhe trajnimeve në fushën e të drejtës kushtetuese, të drejtave të njeriut ose në një fushë tjetër të së drejtës;
 - ç) treguesve shkencorë, ku përfshihen botimet dhe artikujt shkencorë në fushën juridike;
 - d) ecurisë gjatë kryerjes së arsimit të lartë juridik, me një mesatare notash jo më pak se 8, ose të barasvlershme me të, nëse arsimit të lartë është përfunduar jashtë vendit ose vlerësimit përfundimtar në Shkollën e Magjistraturës;
 - dh) informacioneve të marra nga institucione të tjera publike.
4. Organet e emërtesës marrin parasysh përbërjen e Gjykatës Kushtetuese në momentin e emërimit të kandidatit për të garantuar balancën ndërmjet përvojave profesionale të anëtarëve dhe respektimin e barazisë gjinore.”

Neni 7

Pas Nenit 7a shtohet Neni 7/b me përmbajtje si vijon:

“Neni 7/b

Procedura e emërimit nga Presidenti i Republikës

1. Kryetari i Gjykatës Kushtetuese, sipas këtij ligji, njofton për vendin vakant Presidentin e Republikës, i cili, brenda 7 ditëve nga marrja e njoftimit, shpall në mjetet e informimit publik dhe në faqen zyrtare të internetit hapjen e procedurës

së aplikimit. Aplikimet e kandidatëve të shoqëruara me dokumentet që vërtetojnë përmbushjen e kushteve dhe kriterëve të përcaktuara në nenin 7/a paraqiten pranë Presidentit të Republikës, i cili ia dërgon ato Këshillit të Emërimeve në Drejtësi.

2. Kryetari i Këshillit të Emërimeve në Drejtësi, brenda 5 ditëve nga dita e publikimit të listës së kandidatëve, thërret mbledhjen e Këshillit që shqyrton plotësimin e kushteve dhe të kriterëve ligjore nga kandidatët për gjyqtarë të Gjykatës Kushtetuese. Njoftimi për thirrjen e mbledhjes është publik dhe përmban datën, orën dhe vendin e zhvillimit të mbledhjes.

3. Këshilli i Emërimeve në Drejtësi, pas vlerësimit të kushteve dhe të kriterëve të emërimit, brenda 10 ditëve harton një listë përfundimtare duke renditur kandidatët. Nëse ka më shumë se një vend vakant, Këshilli harton dy lista të veçanta. Lista shoqërohet nga një raport me shkrim ku analizohet plotësimi i kushteve dhe kriterëve ligjore për secilin kandidat. Raporti i arsyetuar, pasi miratohet me shumicën e votave të të gjithë anëtarëve të Këshillit të Emërimeve në Drejtësi, publikohet.

4. Presidenti emëron anëtarin e Gjykatës Kushtetuese nga kandidatët e renditur në tre vendet e para të listës. Dekreti i emërimit shpallet i shoqëruar me arsyet e përzgjedhjes së kandidatit.”

Neni 8

Pas Nenit 7/b shtohet Neni 7/c me përmbajtje si vijon:

“Neni 7/c

Procedura e zgjedhjes nga Kuvendi

1. Kryetari i Gjykatës Kushtetuese, sipas këtij ligji, njofton për vendin vakant Kuvendin, i cili, brenda 7 ditëve nga marrja e njoftimit, shpall në faqen zyrtare të internetit hapjen e procedurës së aplikimit. Pranë Kuvendit paraqiten aplikimet e kandidatëve të shoqëruara me dokumentet që vërtetojnë përmbushjen e kushteve dhe kriterëve të përcaktuara në nenin 7/a.

2. Kuvendi, brenda 30 ditëve nga hapja e procedurës së aplikimit, publikon listën e kandidatëve dhe ia dërgon ato Këshillit të Emërimeve në Drejtësi.

3. Brenda 5 ditëve nga dita e publikimit të listës së kandidatëve, Kryetari i Këshillit të Emërimeve në Drejtësi thërret mbledhjen e Këshillit që shqyrton plotësimin e kushteve dhe të kriterëve ligjore nga kandidatët për gjyqtarë të Gjykatës Kushtetuese. Njoftimi për thirrjen e mbledhjes është publik dhe përmban datën, orën dhe vendin e zhvillimit të mbledhjes. Dosjet e kandidatëve, me kërkesën dhe dokumentacionin përkatës, i vihen në dispozicion Këshillit të Emërimeve në Drejtësi nga Kuvendi i Shqipërisë.

4. Këshilli i Emërimeve në Drejtësi, pas vlerësimit të përmbushjes së kushteve dhe kriterëve të emërimit, brenda 10 ditëve harton një listë përfundimtare duke renditur kandidatët. Nëse ka më shumë se një vend vakant Këshilli harton dy lista të veçanta. Lista shoqërohet nga një raport me shkrim, ku analizohet plotësimi i kushteve dhe kriterëve ligjore për secilin kandidat. Raporti i arsyetuar, pasi miratohet me shumicën e votave të të gjithë anëtarëve të Këshillit të Emërimeve në Drejtësi, publikohet.

5. Komisioni i Ligjeve, sipas renditjes, brenda një afati të arsyeshëm, organizon seancat dëgjimore me kandidatët. Dhoma Kombëtare e Avokatisë, Rektoratet e Universiteteve, organizata të shoqërisë civile me veprimtari në mbrojtjen e të drejtave të njeriut ose të krijuara për mbrojtjen e interesave të përdoruesve të sistemit të drejtësisë mund të paraqesin opinionet e tyre në lidhje me kandidaturat pranë Këshillit të Emërimeve në Drejtësi. Pas këtyre seancave, Komisioni i dërgon Kuvendit emrat e 3 (tre) kandidatëve për çdo vend vakant bashkë me raportin e arsyetuar për secilin kandidat të përzgjedhur.

6. Gjyqtarët e Gjykatës Kushtetuese zgjidhen me 3/5 e votave të të gjithë anëtarëve të Kuvendit. Nëse Kuvendi nuk zgjedh gjyqtarin brenda 30 ditëve nga paraqitja e listës nga Këshilli i Emërimeve në Drejtësi, kandidati i renditur i pari në listë konsiderohet i emëruar.

7. Nëse ka më shumë se një vend vakant njëkohësisht, të paktën 1 (një) anëtar i Gjykatës Kushtetuese zgjidhet nga kandidatët me arsim juridik, me jo më pak se 15 vjet eksperiencë në profesionin e avokatit, profesorit të së drejtës, nëpunësit të lartë në administratën publike, ose këshilltarit ligjor në Gjykatën e Lartë apo Gjykatën Kushtetuese.“

Neni 9

Pas Nenit 7/c shtohet Neni 7/ç me përmbajtje si vijon:

“Neni 7/ç

Procedura e zgjedhjes nga Gjykatat e Lartë

1. Kryetari i Gjykatës Kushtetuese, sipas këtij ligji, njofton për vendin vakant Kryetarit të Gjykatës së Lartë, i cili shpall në mjetet e informimit publik dhe në faqen zyrtare të internetit hapjen e procedurës së aplikimit. Kryetari i Gjykatës së Lartë pranon kandidaturat brenda 30 ditëve nga njoftimi, i bën ato publike dhe ia dërgon Këshillit të Emërimeve në Drejtësi.

2. Këshilli i Emërimeve në Drejtësi, pas vlerësimit të kushteve dhe kriterëve të emërimit, brenda 10 ditëve rendit kandidatët dhe i paraqet Kryetarit të Gjykatës së Lartë raportin e miratuar me shumicën e të gjithë anëtarëve, bashkë me listën

dhe dokumentacionin shoqërues, për çdo kandidat. Raporti i arsyetuar i Këshillit të Emërimeve në Drejtësi publikohet. Nëse ka më shumë se një vend vakant Këshilli harton dy lista të veçanta.

3. Kryetari i Gjykatës së Lartë thërret mbledhjen e posaçme të gjyqtarëve të Gjykatës së Lartë. Mbledhja është e vlefshme nëse marrin pjesë jo më pak se 3/4 e të gjithë gjyqtarëve të Gjykatës së Lartë. Lista me kandidatët u bëhet e njohur më parë të gjithë pjesëmarrësve në mbledhje.

4. Për çdo vend vakant votohet për secilin nga kandidatët e renditur në tre vendet e para të listës. Kandidati që merr 3/5 e votave të gjyqtarëve të pranishëm shpallet i zgjedhur. Nëse nuk arrihet shumica e nevojshme, 2 kandidatët që kanë marrë më shumë vota i nënshtrohen një votimi të dytë ku shpallet i zgjedhur kandidati që merr shumicën e votave.

5. Emri i gjyqtarit të zgjedhur i njoftohet menjëherë Kryetarit të Kuvendit, Presidentit të Republikës dhe Kryetarit të Gjykatës Kushtetuese.”

Neni 10

Pas Nenit 7/ç shtohet Neni 7/d me përmbajtje si vijon:

“Neni 7/d

Zgjedhja e Kryetarit të Gjykatës Kushtetuese

1. Kryetari i Gjykatës Kushtetuese zgjidhet me votim të fshehtë, me shumicën e votave të të gjithë gjyqtarëve të Gjykatës Kushtetuese, për një periudhë 3 vjeçare me të drejtë rizgjedhjeje vetëm një herë.¹

2. Seanca për zgjedhjen e Kryetarit drejtohet nga gjyqtari më i vjetër në detyrë. Në rast se ka më shumë se një kandidat dhe gjatë votimit asnjëri prej tyre nuk merr shumicën e parashikuar të votave, bëhet një votim i ri dhe, pas këtij, vijohet me votimin mes kandidatëve që kanë marrë numrin më të madh të votave. Në përfundim të këtij votimi shpallet i zgjedhur kandidati që ka marrë shumicën e votave. Nëse asnjë nga kandidatët nuk ka marrë shumicën e votave ose votat janë ndarë në mënyrë të barabartë, kryetari caktohet me short. Procedura e zhvillimit të shortit parashikohet me vendim të Mbledhjes së Gjyqtarëve.

3. Kryetari i zgjedhur njofton Presidentin e Republikës dhe Kryetarin e Kuvendit.“

Neni 11

¹Ka pasur edhe një opinion të kundërt për të kufizuar të drejtën e rizgjedhjes së Kryetarit të Gjykatës Kushtetuese, me këtë formulim: “1. *Kryetari i Gjykatës Kushtetuese zgjidhet me votim të fshehtë, me shumicën e votave të të gjithë gjyqtarëve të Gjykatës Kushtetuese, për një periudhë 3 vjeçare pa të drejtë rizgjedhjeje.*”

Pas Nenit 7/d shtohet Neni 7/dh me përmbajtje si vijon:

“Neni 7/dh

Përtëritja e përbërjes së Gjykatës Kushtetuese

1. Përbërja e gjyqtarëve të Gjykatës Kushtetuese përtërihet rregullisht çdo 3 vjet, në një të tretën e saj.
2. Përtëritja e gjyqtarëve deri në vitin 2022, kur të gjejë zbatim përtëritja e rregullt sipas pikës 1 të këtij neni, do të bëhet sipas skemës së parashikuar më poshtë:
 - a) Gjyqtarët që do të zëvendësojnë gjyqtarët të cilëve u mbaron mandati në vitin 2016 emërohen sipas radhës, përkatësisht nga Presidenti i Republikës dhe nga Kuvendi.
 - b) Gjyqtari që do të zëvendësojë gjyqtarin, të cilit i mbaron mandati në vitin 2017 zgjidhet nga Gjykata e Lartë dhe qëndron në detyrë deri në vitin 2025.
 - c) Gjyqtarët që do të zëvendësojnë gjyqtarët që u mbaron mandati në vitin 2019 emërohen sipas radhës, përkatësisht nga Presidenti i Republikës dhe nga Kuvendi.
 - ç) Gjyqtari që do të zëvendësojë gjyqtarin, të cilit i mbaron mandati në vitin 2020 zgjidhet nga Gjykata e Lartë dhe qëndron në detyrë deri në vitin 2028.
 - d) Gjyqtarët që do të zëvendësojnë gjyqtarët, të cilëve u mbaron mandati në vitin 2022 emërohen sipas radhës, përkatësisht nga Presidenti i Republikës, nga Kuvendi dhe nga Gjykata e Lartë.
3. Në rast të përfundimit para afatit të mandatit të gjyqtarit të Gjykatës Kushtetuese, zgjedhja e gjyqtarit të ri ndjek radhën e parashikuar për zëvendësimin e tij, sipas pikës 2 të këtij neni.”

Neni 12

Në Nenin 8, paragrafi 3, pas fjalëve “datën e njëjtë të atij muaji,” shtohen fjalët “të vitit të nëntë”.

Neni 13

Neni 9 ndryshohet si vijon:

“Neni 9

Mbarimi i mandatit

1. Mandati i gjyqtarit të Gjykatës Kushtetuese mbaron në rastet e mëposhtme:

- a) mbush moshën 70 vjeç;
 - b) përfundon mandatin 9 vjeçar;
 - c) jep dorëheqjen;
 - ç) shkarkohet sipas parashikimeve të nenit 128 të Kushtetutës;
 - d) vërtetohen kushtet e pazgjedhshmërisë dhe të papajtueshmërisë në ushtrimin e funksionit;
 - dh) vërtetohet fakti i pamundësisë për të ushtruar detyrën.
2. Mbarimi i mandatit të gjyqtarit deklarohet me vendim të Gjykatës Kushtetuese. Kërkesa për deklarimin e mbarimit të mandatit të gjyqtarit bëhet nga Kryetari i Gjykatës Kushtetuese.
3. Kryetari i Gjykatës Kushtetuese, jo më vonë se 3 muaj përpara përfundimit të mandatit të një gjyqtari të Gjykatës Kushtetuese, sipas paragrafit 1 shkronjat a) dhe b), si dhe menjëherë në rastet e mbarimit të mandatit përpara afatit ligjor, njofton organin e emërtesës për vendin vakant. Procedura për emërimin e gjyqtarit të ri përfundon jo më vonë se 60 ditë nga vendimi i Gjykatës Kushtetuese që ka deklaruar përfundimin e mandatit.
4. Në çdo rast të mbarimit të mandatit të gjyqtarit vihet në dijeni Presidenti i Republikës dhe Kuvendi i Shqipërisë.”

Neni 14

Pas KREUT II shtohet KREU II/1 me titull “Përgjegjësia disiplinore e gjyqtarit të Gjykatës Kushtetuese.”

Neni 10 ndryshohet si vijon:

“Neni 10

Shkeljet disiplinore

Gjyqtari i Gjykatës Kushtetuese mban përgjegjësi disiplinore për shkak të:

1. mosparaqitjes së kërkesës për heqje dorë nga procedimi apo gjykimi i çështjes, kur kjo është e detyrueshme, sipas ligjit procedural dhe gjyqtari është në dijeni të rrethanave të tilla;
2. sjelljes, akteve dhe veprimeve të tjera të gjyqtarit që krijojnë përfitime të padrejta ose dëme për palët pjesëmarrëse në gjykim;
3. mosnjoftimit të Kryetarit të gjykatës ose të organeve kompetente sipas ligjit, për ndërhyrjet apo ushtrimin e formave të tjera të ndikimit të papërshtatshëm nga avokatët, funksionarët politikë, funksionarët publikë dhe subjekte të tjerë;
4. ndërhyrjeve ose çdo lloj ndikimi tjetër të papërshtatshëm në ushtrimin e detyrës të një gjyqtari tjetër;

5. mosnjoftimittëKryetarit dhe tëinstitucioneve përgjegjësepërekzistencën e dyshimit të arsyeshëm, të rasteve të papajtueshmërisë për ushtrimin e funksionit të tij;
6. mospërbushjes së pajustificuar e në mënyrë të qëllimshme ose të përsëritur, përkatësisht të funksionit të tij;
7. paraqitjes së kërkesës për heqje dorë dhe kryerjes së atyre veprimeveqë nuk bazohen në shkaqet e parashikuara në ligj ose që bëhen në mënyrë të qëllimshme për të krijuar përfitime të padrejta për palët dhe të tretët, ose kur synojnë të shmangin gjyqtarin nga detyrimi ligjor për shqyrtimin e çështjes ose synojnë të krijojnë mundësinë e shqyrtimit të saj nga gjyqtarët të tjerë ose kur dorëheqja jepet e vonuar megjithëse ka qenë në dijeni të faktit për të cilin jep dorëheqjen;
8. shkeljes së përsëritur ose të rëndë të rregullave të solementitetit dhe rregullave të sjelljes në marrëdhëniet me pjesëmarrësit në proces, si edhe me gjyqtarë ose administratën dhe punonjës të tjerë të Gjykatës Kushtetuese;
9. vonesës dhe zvarritjes së përsëritur dhe të pajustificuar të veprimeve procedurale dhe gjatë ushtrimit të funksionit;
10. bërjes publike të mendimeve që ka dhënë vetë ose gjyqtarët e tjerë gjatë procesit që akoma nuk kanë marrë formën e një akti të bërë publik;
11. shkeljes së detyrimit të konfidencialitetit dhe të mospërhapjes së informacionit, që rezultojnë nga hetimi ose gjykimi, në proces apo i përfunduar, duke përfshirë lehtësinë e publikimit dhe shpërndarjes, gjithashtu edhe për shkak të neglizhencës, të akteve konfidencialë ose akteve procedurale ose informacioneve konfidenciale që rrjedhin nga çështjet të cilat janë në proces hetim ose gjykimi;
12. bërjes së deklaratave publike dhe në media, për çështjet, me përjashtim të komunikimeve të shtypit brenda kufijve të detyrës së tij;
13. parashtrimi të dukshëm, të shtrembëruar të fakteve në aktet e nxjerra;
14. përdorimit të mandatit të gjyqtarit me qëllim për të realizuar përfitime të pajustificuara ose avantazhe për vete ose për të tjerët;
15. shoqërimit me persona që janë nën ndjekje penale ose janë subjekte të një procedimi penal, ose me persona të dënuar, përveç rasteve të rehabilitimit të personave të dënuar, ose persona të cilët janë të afërm me gjyqtarët në lidhje gjaku ose me ligj, dhe pasja e marrëdhënieve biznesi të papërshtatshme me këta persona;
16. përfitimit të padrejtë, në mënyrë të drejtpërdrejtë apo të tërthortë, të dhuratave, favoreve, premtimeve ose trajtimeve preferenciale të çfarëdo lloji, të cilat, qoftë edhe me anë të veprimeve të ligjshme, i jepen për shkak

të funksionit që ushtron ose si rrjedhojë e përdorimit prej tij të pozicionit të magjistratit;

17. sjelljessë papërshtatshme në përmbushjen e detyrimeve, në marrëdhëniet dhe në komunikimin me institucionet shtetërore dhe funksionarët e tyre, dhe raste të tjera me sjellje të papërshtatshme të pajustificuar.”

Neni 15

Pas Nenit 10 shtohet Neni 10/a me këtë përmbajtje:

“Neni 10/a

Fillimi dhe zhvillimi i procedimit disiplinor

1. Kur ka të dhëna të mjaftueshme se një gjyqtar i Gjykatës Kushtetuese ka kryer shkelje të parashikuara në nenin 128 të Kushtetutës dhe në nenin 10 të këtij ligji, me kërkesë të Kryetarit ose të çdo gjyqtari të Gjykatës Kushtetuese, Kryetari, ose gjyqtari më i vjetër në detyrë, kur subjekt i procedimit është Kryetari, merr masat për fillimin e procedimit disiplinor.
2. Procedimi disiplinor fillon brenda 3 muajve nga konstatimi i shkeljes, por jo më vonë se një vit nga kryerja e shkeljes. Procedimi disiplinor pushon, në rast se gjyqtari jep dorëheqjen. Në këtë rast ai nuk ka të drejtë të emërohet më në funksione publike për një periudhë 15 vjeçare.
3. Dy gjyqtarë të caktuar me short mbledhin fakte, prova dhe të dhëna të tjera lidhur me shkeljen që i atribuohet gjyqtarit dhe brenda 30 ditëve përgatisin relacionin përkatës dhe ia dërgojnë atë për shqyrtim Komisionit Disiplinor.
4. Komisioni Disiplinor përbëhet nga 3 gjyqtarë të Gjykatës Kushtetuese të caktuar me short, pa pjesëmarrjen e gjyqtarëve që kanë marrë pjesë në mbledhjen e fakteve dhe provave sipas pikës 3 të këtij neni. Komisioni merr në shqyrtim relacionin e paraqitur dhe vendos dhënien e masës disiplinore sipas nenit 10/b të këtij ligji ose pushimin e çështjes për shkak se nuk provohet shkelja.
5. Gjyqtari, subjekt i procedimit, ka të drejtë të ushtrojë ankim ndaj vendimit të Komisionit Disiplinor. Ankimi mund të shqyrtohet nga komisioni ad hoc i përbërë nga tre gjyqtarët e Gjykatës Kushtetuese, që nuk kanë marrë pjesë në procedim, sipas pikës 3 dhe 4 të këtij neni.

Neni 16

Pas Nenit 10/a shtohet Neni 10/b me këtë përmbajtje:

**“Neni 10/b
Masat disiplinore**

1. Ndaj gjyqtarit mund të vendosen këto masa disiplinore:
 - a) vërejtje me shkrim;
 - b) vërejtje publike;
 - c) ulje e përkohshme e pagës deri në 50% për një periudhë jo më të gjatë se 1 vit;
 - ç) pezullim nga detyra për një periudhë nga 3 muaj deri në 6 muaj, ;
 - d) shkarkim nga detyra.
2. Gjatë kohës së procedimit disiplinor, gjyqtari pezullohet nga detyra, sipas nenit 10/c të këtij ligji dhe përfiton 50% të pagës së tij.”

Neni 17

Pas Nenet 10/b shtohet Neni 10/c me këtë përmbajtje:

**“Neni 10/c
Shqyrtimi i shkeljes disiplinore**

1. Komisioni Disiplinor shqyrton çështjen brenda 10 ditëve nga paraqitja e relacionit dhe vendos:
 - a) Miratimin e relacionit për marrjen e masës disiplinore;
 - b) Rrëzimin e relacionit;
 - c) Kthimin e çështjes për mbledhje të provave dhe fakteve të tjera;
 - ç) Pushimin e çështjes, kur gjyqtari jep dorëheqjen nga detyra, ose i mbaron mandati.
2. Vendimi i njoftohet gjyqtarit të proceduar dhe në çdo rast publikohet. Kur ndaj gjyqtarit të proceduar vendoset shkarkimi nga detyra, vendimi njëherazi me publikimin i dërgohet dhe organit të emërtesës.”

Neni 18

Pas Nenet 10/c shtohet Neni 10/ç me këtë përmbajtje:

**“Neni 10/ç
Pezullimi i gjyqtarit nga detyra**

1. Gjyqtari pezullohet nga detyra me vendim të Mbledhjes së Gjyqtarëve kur:

a) ndaj tij caktohet masa e sigurimit personal “arrest në burg” ose “arrest në shtëpi”;

b) merr cilësinë e të pandehurit;

c) fillon procedimi disiplinor, sipas këtij ligji.

2. Kryetari ose gjyqtari më i vjetër, kur subjekt procedimi është Kryetari, brenda 3 ditëve nga marrja dijeni e shkaqeve të parashikuara në paragrafin 1 të këtij neni, thërret Mbledhjen e Gjyqtarëve, e cila vendos për masën e pezullimit ndaj gjyqtarit. Vendimi i Mbledhjes së Gjyqtarëve është përfundimtar.

3. Gjyqtari i pezulluar nuk merr pjesë në shqyrtimin e çështjeve deri në heqjen e masës së pezullimit nga Mbledhja e Gjyqtarëve.

4. Kryetari merr masa për caktimin e një relatori të ri përçështjet e caktuara gjyqtarit të pezulluar.”

Neni 19

Neni 11 shfuqizohet.

Neni 20

Pas KREUT II/1 shtohet KREU II/2 me titull “Organizimi i Gjykatës Kushtetuese.”

Në Nenin 12 shtohet paragrafi 1 me këtë përmbajtje:

“Neni 12

Kompetencat e Kryetarit

1. Veprimtaria e Gjykatës Kushtetuese drejtohet dhe organizohet nga Kryetari i saj dhe, në mungesë të tij, nga gjyqtari më i vjetër, me përjashtim të rasteve kur çështja është në kompetencë të Mbledhjes së Gjyqtarëve.”

Neni 21

Neni 13 ndryshohet si vijon:

“Neni 13

Kompetencat e Mbledhjes së Gjyqtarëve

Mbledhja e Gjyqtarëve të Gjykatës Kushtetuese ka këto kompetenca:

a) Përcakton drejtimit kryesore të shpenzimeve të mjeteve buxhetore.

b) Informohet çdo 6 muaj me raporte për shpenzimet buxhetore.

c) Vendos për strukturën organizative të Gjykatës Kushtetuese.

ç) Vendos për numrin e nëpunësve të administratës, të Njesisë së Shërbimit Ligjor dhe punonjësve të tjerë, si dhe kriteret profesionale që duhet të përmbushin dhe pagat e tyre.

d) Miraton rregulloren për procedurat gjyqësore të Gjykatës Kushtetuese si dhe rregulloren e brendshme për veprimtarinë e administratës së Gjykatës Kushtetuese.

dh) emëron Sekretarin e Përgjithshëm, me propozim të Kryetarit.

e) Cakton kolegjet në fillim të çdo viti kalendarik, sipas rregullores së Gjykatës Kushtetuese;

ë) Shqyrton në shkallë të fundit ankimet e nëpunësve civilë, këshilltarëve ligjorë dhe ndihmësit ligjorë si dhe punonjësve të tjerë të Gjykatës Kushtetuese për masat disiplinore ndaj tyre, përfshirë edhe largimin nga detyra.

Neni 22

Neni 14 ndryshohet si vijon:

“Neni 14

Administrata e Gjykatës Kushtetuese

1. Administrata e Gjykatës përbëhet nga nëpunësit civilë dhe punonjës të tjerë.
2. Sekretari i Përgjithshëm është nëpunësi më i lartë civil dhe emërohet nga Mbledhja e Gjyqtarëve të Gjykatës Kushtetuese, me propozim të Kryetarit, nga radhët e juristëve me përvojë profesionale jo më pak se 10 vjet.
3. Ai shkarkohet me vendim të Mbledhjes së Gjyqtarëve, me propozim të një gjyqtari të Gjykatës Kushtetuese, sipas rregullave të parashikuara nga Mbledhja e Gjyqtarëve për këtë qëllim.
4. Sekretari i Përgjithshëm, nën autoritetin dhe sipas udhëzimeve të Kryetarit të Gjykatës Kushtetuese, drejton veprimtarinë administrative të Gjykatës Kushtetuese.
4. Nëpunësit civilë të administratës së Gjykatës Kushtetuese i nënshtrohen rregullave të shërbimit civil për aq sa nuk bien ndesh me këtë ligj dhe trajtohen financiarisht njëjloj si administrata e Kuvendit të Republikës së Shqipërisë.
5. Të drejtat dhe detyrat e Sekretarit të Përgjithshëm, nëpunësve civilë dhe të punonjësve të tjerë përcaktohen nga ky ligj dhe Rregullorja e Brendshme.”

Neni 23

Pas Nenit 14 shtohet Neni 14/a me këtë përmbajtje:

“Neni 14/a Njësia e Shërbimit Ligjor

1. Pranë Gjykatës Kushtetuese funksionon Njësia e Shërbimit Ligjor, e cila përbën bërthamën shkencore juridike të Gjykatës Kushtetuese. Ajo ushtron veprimtari këshilluese dhe ndihmëse në procesin vendimmarrës të Gjykatës Kushtetuese duke përfshirë: përgatitjen e çështjeve për gjykim, dhënien e opinioneve ligjore dhe përgatitjen e kërkimeve shkencore për çështjet gjyqësore që janë për shqyrtim para Gjykatës Kushtetuese, si dhe çdo detyrë tjetër që i caktohet nga Kryetari ose Mbledhja e Gjyqtarëve.
2. Njësia e Shërbimit Ligjor përbëhet nga këshilltarët ligjorë, të cilët emërohen nga Kryetari, nga radhët e gjyqtarëve dhe prokurorëve për një periudhë 5 vjeçare, me të drejtë riemërimi, sipas kushteve dhe kriterëve të parashikuara në ligjin për statusin e gjyqtarëve dhe prokurorëve. Në raste të veçanta, por jo më shumë se 1/5 e numrit të përgjithshëm të këshilltarëve ligjorë në Gjykatën Kushtetuese mund të emërohen nga rradhët e juristëve me përvojë jo më pak se 10 vjet, si lektorë të së drejtës, avokatë ose nëpunës së lartë të administratës publike. Pas përfundimit të periudhës së emërimit, me kërkesë të tij, këshilltari ligjor kthehet në vendin e mëparshëm të punës.
3. Njësia e Shërbimit Ligjor është në varësi të Kryetarit dhe Mbledhjes së Gjyqtarëve dhe drejtohet nga një prej Këshilltarëve Ligjorë të caktuar nga Kryetari. Numri i Këshilltarëve ligjorë caktohet me vendim të Mbledhjes së Gjyqtarëve.
4. Kryetari për çdo çështje gjyqësore cakton këshilltarin ligjor, duke marrë për bazë përvojën profesionale dhe ekspertizën ligjore të tij, sipas Rregullores.

Neni 24

Neni 16 ndryshon si vijon:

“Neni 16 Imuniteti

Gjyqtari i Gjykatës Kushtetuese gëzon imunitet për mendimet e shprehura dhe vendimet e marra në ushtrim të funksioneve të tij, përveç rasteve të dhënies qëllimisht të një vendimi si pasojë e një interesi personal ose keqdashje.”

Neni 25

Pas Nenit 16 shtohet Neni 16/a me këtë përmbajtje:

**“Neni 16/a
Papajtueshmëria**

1. Qenia gjyqtar i Gjykatës Kushtetuese nuk pajtohet me asnjë veprimtari tjetër shtetërore, si dhe veprimtari profesionale që ushtrohet kundrejt pagesës, me përjashtim të aktivitetit mësimdhënës dhe akademik, shkencor dhe artistik për zhvillimin e doktrinës. Kohëzgjatja e veprimtarisë profesionale të lejueshme, si dhe masa e shpërblimit parashikohen me vendim të Mbledhjes së Gjyqtarëve. Ushtrimi i funksionit të gjyqtarit nuk pajtohet me qenien anëtar në një parti politike apo pjesëmarrjen në aktivitete publike të organizuara nga një parti politike, si dhe me veprimtari të tjera të papajtueshme me detyrën e gjyqtarit të Gjykatës Kushtetuese.
2. Gjyqtari i sapozgjedhur merr masat për shmangien e çdo situatë papajtueshmërie brenda 10 ditëve nga betimi.
3. Nëse anëtar i Gjykatës Kushtetuese gjatë ushtrimit të detyrës ndodhet në një situatë papajtueshmërie, ai menjëherë merr masa për shmangien e saj. Në rast të kundërt, gjejnë zbatim rregullimet e nenit 10 e në vijimtë këtij ligji.”

Neni 26

Neni 21, paragrafi 1 ndryshohet si vijon:

“Procesi publik

1. Shqyrtimi i çështjeve nga Gjykata Kushtetuese bëhet në seancë plenare publike osembi bazë të dokumenteve. Në çdo rast vendos Kolegji ose Mbledhja e Gjyqtarëve.”

Neni 27

Në Nenin 22, paragrafi 2, pas fjalëve “nga Gjykata Kushtetuese,” shtohen fjalët “me kërkesë të palës.”.

Neni 28

Neni 23shfuqizohet.

Neni 29

Neni 24 ndryshohet si vijon:

“Neni 24

Mbrojtja në gjykimin kushtetues

1.Pjesëmarrësit në gjykimin kushtetues mbrohen vetë ose nëpërmjet përfaqësuesit ligjor.Kur çështja kalon për gjykim dhe objekt kërkese është një ligj ose akt normativ kërkuesi përfaqësohet në gjykim me avokat ose përfaqësues ligjor të specializuar.

Neni 30

Në nenin 25 ndryshohet titulli si vijon:

“Paanshmëria në gjykimin kushtetues.”

Neni 31

Neni 26 ndryshohet si vijon:

“Neni 26

Publikimi i vendimit përfundimtar dhe hyrja e tij në fuqi

1. Vendimet e Gjykatës Kushtetuese botohen në Fletoren Zyrtare,si dhe bëhen të njohura në mjete të tjera të informimit publik. Botimi i vendimeve të Gjykatës Kushtetuese bëhet jo më vonë se 15 ditë nga depozitimi i tyre për botim në Fletoren Zyrtare. Mendimi i pakicës botohet bashkë me vendimin përfundimtar.
2. Vendimet, si rregull, hyjnë në fuqi ditën e botimit, përveçse kur është parashikuar ndryshe në këtë ligj. Kur vendimi sjell pasoja për të drejtat kushtetuese të individit, Gjykata Kushtetuese mund të vendosë që ai të hyjë në fuqi ditën e shpalljes së tij. Në këtë rast, vendimi shoqërohet me një arsyetim të përmbledhur. Forma e plotë e vendimit publikohet brenda një afati të arsyeshëm.
3. Gjykata Kushtetuese mund të urdhërojë që vendimi i saj, me të cilin ka shqyrtuar aktin, të fillojë efektet në një datë tjetër. Në këtë rast, Gjykata Kushtetuese mund të urdhërojë pezullimin e zbatimit të aktit të shfuqizuar prej saj ndaj kërkuesit në çështjen gjyqësore deri në kohën kur vendimi fillon efektet.
4. Gjykata Kushtetuese përgatit dhe publikon përmbledhje periodike të vendimeve të saj.”

Neni 32

Neni 27 ndryshohet si vijon:

“Neni 27

Përmbajtja e kërkesës

1. Kërkesa në Gjykatën Kushtetuese paraqitet nga kërkuesi ose përfaqësuesi i zgjedhur prej tij. Në rast se kërkuesi ka zgjedhur të përfaqësohet nga një avokat, ai i bashkëngjit kërkesës aktin e përfaqësimit. Në një rast të tillë të gjitha njoftimet e Gjykatës i drejtohen përfaqësuesit të kërkuesit.

2. Kërkesa paraqitet në formë të shkruar në gjuhën shqipe, qartë e kuptueshëm, në aq kopje sa janë pjesëmarrësit në gjykim dhe duhet të përmbajë:

a) emrin dhe adresën e Gjykatës Kushtetuese;

b) emrin, mbiemrin ose emërtimin, vendbanimin ose vendqëndrimin e kërkuesit dhe/ose të përfaqësuesit;

c) emrin, mbiemrin ose emërtimin, vendbanimin ose vendqëndrimin e subjekteve të interesuara dhe ose të përfaqësuesve të tyre;

ç) objektin e kërkesës dhe bazën ligjore;

d) parashtrimin e shkaqeve dhe shkeljet e natyrës kushtetuese të pretenduara;

dh) dokumentet, provat, apo materiale të tjera që shoqërojnë kërkesën;

e) kopje të noterizuara të të gjitha vendimeve objekt kërkesë, si dhe të ankimeve dhe rekurseve të paraqitura në instancat e tjera gjyqësore;

ë) nënshkrimin e kërkuesit ose të përfaqësuesit të tij, si dhe aktin e përfaqësimit të këtij të fundit.

3. Kërkesa mund të paraqitet dorazi ose me postë. Në rast të dërgimit të kërkesës me postë, data e paraqitjes së saj konsiderohet data e dorëzimit në zyrën postare. Në rast se kërkesa është dërguar gabimisht në një institucion tjetër dhe kërkesa është paraqitur në Gjykatën Kushtetuese pas përfundimit të afatit ligjor, kërkesa konsiderohet e paraqitur në afat në rast se provohet se kjo ka ndodhur në mirëbesim.

4. Kërkesa që plotëson kriteret e parashikuara në pikën 2 të këtij neni regjistrohet në regjistrin e posaçëm që mbahet nga Drejtoria Gjyqësore pranë Gjykatës Kushtetuese.

5. Kërkesa që nuk plotëson kriteret e parashikuara në pikën 2 të këtij nenikonsiderohet e paplotë dhe nuk regjistrohet në regjistrin e kërkesave por i kthehet kërkuesit, të cilit i lihet një afat 10 ditor nga Drejtoria Gjyqësore për të bërë plotësimet e nevojshme. Në rast se kërkuesi nuk e paraqet kërkesën të plotësuar ose brenda afatit të caktuar nga Drejtoria Gjyqësore, kërkesa arkivohet.

6. Kërkesa e regjistruar në regjistrin e kërkesave i dorëzohet Kryetarit të Gjykatës Kushtetuese, i cili merr masat për caktimin e relatorit dhe këshilltarit ligjor për përgatitjen e çështjes për shqyrtim.”

Neni 33

Neni 28 ndryshohet si vijon:

“Neni 28

Shpenzimet gjyqësore

1. Procesi gjyësor para Gjykatës Kushtetuese i nënshtrohet rregullave të parashikuara në ligjin për tarifat gjyqësore.
2. Kur Gjykata Kushtetuese vendos pranimin e ankimit individual kushtetues, ajo mund të shprehet edhe për shpenzimet e përfaqësimit pjesërisht ose tërësisht, nëse kërkohet nga kërkuesi.”

Neni 34

Neni 29 dhe Neni 30 shfuqizohen.

Neni 35

Neni 31 ndryshohet si vijon:

“Neni 31

Shqyrtimi paraprak i kërkesës

1. Kërkesa shqyrtohet paraprakisht nga kolegji i përbërë nga 3 gjyqtarë të Gjykatës Kushtetuese, ku bën pjesë dhe relatori.
2. Kur kërkesa, megjithëse është në kompetencë të Gjykatës Kushtetuese dhe është paraqitur nga subjekti që legjitimohet, nuk është e plotë për ndonjë shkak të ndryshëm nga ata që parashikohen në nenin 27 të këtij ligji, Kolegji ia kthen kërkuesit për plotësim, duke dhënë shkaqet e kthimit dhe afatin e plotësimit të saj. Kur kërkesa paraqitet e plotësuar brenda afatit të përcaktuar për korrigjimin e të metave, ajo kalon përsëri për shqyrtim paraprak në kolegji. Në këtë rast si datë e paraqitjes së kërkesës konsiderohet data e paraqitjes së saj për herë të parë në Gjykatë. Në rast se kërkesa paraqitet në Gjykatë brenda afatit të përcaktuar për korrigjimin e të metave, por e paplotësuar, Kolegji vendos moskalimin e saj për gjykim.

3. Kur kërkesa nuk përmbush kriteret e parashikuara në nenin 31/a pika 2 të këtij ligji, kolegji vendos kalimin e çështjes në seancë plenare. Në të gjitha rastet, kur ndonjë nga gjyqtarët e kolegjit nuk është i një mendimi me të tjerët, kërkesa i kalon për shqyrtim paraprak Mbledhjes së Gjyqtarëve.

4. Kolegji ose Mbledhja e Gjyqtarëve nuk shqyrton themeline çështjes në këtë fazë.

5. Për ankesat, lutjet dhe çdo korrespondencë tjetër që nuk përmban elementet e kërkesës në kuptim të nenit 27 të këtij ligji, ato regjistrohen në regjistër të veçantë dhe veprohet administrativisht.”

Neni 36

Pas Nenit 31 shtohet Neni 31/a me këtë përmbajtje:

“Neni 31/a

Moskalimi i çështjes për shqyrtim në seancë plenare

1. Kolegji vendos njëzëri për moskalimine çështjes për shqyrtim në seancë plenare. Mbledhja e Gjyqtarëve vendos me shumicën e votave për moskalimin e çështjes në seancë plenare.

2. Moskalimi i çështjes në seancë plenare vendoset kur:

a) kërkimet e paraqitura në kërkesë nuk hyjnë në kompetencën Gjykatës Kushtetuese;

b) kërkesa nuk është paraqitur nga subjekti që legjitimohet;

c) kërkesa është paraqitur nga një person i paautorizuar;

ç) vërtetohet se kërkesa është paraqitur jashtë afatit ligjor;

d) kërkuesi nuk ka shteruar mjetet juridike efektive para se t'i drejtohet Gjykatës Kushtetuese, me përjashtim të rasteve të parashikuara në nenin 71/d të këtij ligji.

dh) kërkimet e paraqitura në kërkesë janë objekt i një vendimi të mëparshëm të Gjykatës Kushtetuese, ose rivendosja në vend e të drejtës së shkelur nuk është e mundur;

e) kërkesa është haptazi e pabazuar.

Neni 37

Pas Nenit 31/a shtohet Neni 31/b me këtë përmbajtje:

“Neni 31/b

Heqja dorë nga kërkesa

1.Kërkuesi mund të heqë dorë nga kërkesa përpara fillimit të shqyrtimit të saj nga Gjykata Kushtetuese. Në këtë rast Gjykata Kushtetuese vendos pushimin e gjykimit të çështjes.

2.Gjykata Kushtetuese vendos mospranimin e heqjes dorë nga kërkesa kur vlerëson se shqyrtimi i saj paraqet interes publik. Në këtë rast Gjykata Kushtetuese arsyeton vendimin për mospranimin e heqjes dorë.”

Neni 38

Pas Nenet 31/b shtohet Neni 31/c me këtë përmbajtje:

“Neni 31/c

Abuzimi me të drejtën për të paraqitur kërkesë

1. Gjykata Kushtetuese, kur konstaton se kërkuesi ose përfaqësuesi i tij ligjor paraqet kërkesëabuzive ose të përsëritur, për të njëjtin shkak dhe objekt, megjithëse ajo është shqyrtuar një herë nga Gjykata Kushtetuese, ose kur konstatohet se kërkuesi ose përfaqësuesi ligjor kanë fshehur ose shtrembëruar fakte dhe rrethana që lidhen me çështjen, urdhëron gjobitjen e tij në shumën nga 100.000-500.000 Lekë.Kur Gjykata konstaton se ndodhet përpara rasteve të falsifikimit të dokumenteve ose ndonjë vepre tjetër penale, ajo njëkohësisht ia dërgon materialet për hetim prokurorisë.

2. Vendimi në rastet e parashikuara në pikën 1 të këtij neni merret nga Mbledhja e Gjyqtarëve, me propozim të Kryetarit ose të relatorit të çështjes.

3. Gjoba e vendosur nga Mbledhja e Gjyqtarëve është titull ekzekutiv.”

Neni 39

Neni 32 ndryshohet si vijon:

“Neni 32

Shqyrtimi në seancë plenare

1. Gjykata Kushtetuese shqyrton çështjet në seancë gjyqësore me pjesëmarrjen e të gjithë gjyqtarëve të Gjykatës Kushtetuese, por në asnjë rast të jo më pak se të dy të tretave të tyre.

2. Rregullat mbi seancën gjyqësore të zhvilluar me dyer të mbyllura caktohen me vendim të Mbledhjes së Gjyqtarëve.

3. Gjatë zhvillimit të seancës respektohen rregullat e solemnitetit dhe të sigurisë, të cilat përcaktohen në Rregulloren e Brendshme.

4.Regjistrimet radiofonike, televizive, audio ose video nga përfaqësues të medias gjatë seancës plenare lejohen vetëm me pëlqimin e Gjykatës, në varësi të çështjes konkrete.”

Neni 40

Neni 33 ndryshohet si vijon:

“Neni 33

Thirrja dhe drejtimi i seancës plenare

1. Kryetari i Gjykatës Kushtetuese thërret dhe drejton seancën plenare të Gjykatës Kushtetuese. Nëse Kryetari është në pamundësi për të marrë pjesë në gjykim, ai cakton gjyqtarin më të vjetër në detyrë për të kryesuar seancën.
2. Kryesuesi i seancës plenare ushtron këto detyra:
 - a) merr masa për hetimin e plotë dhe të paanshëm të rrethanave të çështjes;
 - b) orienton dialogun mes palëve dhe eviton çdo diskutim që është i panevojshëm për çështjen;
 - c) ndërpret palët pjesëmarrëse kur diskutimi i tyre nuk ka lidhje me çështjen ose nuk përfshihet në juridiksionin e Gjykatës Kushtetuese;
 - ç) u heq të drejtën e fjalës palëve nëse diskutimi i tyre është arbitrar, fyes dhe në kundërshtim me rregullat e etikës dhe moralit;
 - d) kur ata nuk zbatojnë urdhërimet e kryesuesit të séances, si dhe kur nuk tregojnë respekt për trupin gjykues dhe Kushtetutën.
3. Kryesuesi i seancës mund të urdhërojë largimin e personave nga salla nëse nuk i nënshtrohen rregullave të gjykimit dhe urdhërimeve të Gjykatës Kushtetuese.
4. Si rregull seanca zhvillohet pa ndërprerje. Në raste të veçanta, kryesuesi i seancës, pas marrjes së mendimit të anëtarëve të trupit gjykues, njofton ndërprerjen e seancës plenare:
 - a) kur është e nevojshme për të pushuar;
 - b) kur palët kërkojnë kohë shtesë të përgatiten për pretendimet përfundimtare;
 - c) kur ecuria normale e seancës është cenuar, si dhe në raste të tjera kur shihet e arsyeshme nga gjykata.”

Neni 41

Neni 36 ndryshohet si vijon:

“Neni 36

Heqja dorë nga shqyrtimi i çështjes

1. Gjyqtari i Gjykatës Kushtetuese kërkon heqjen dorë nga shqyrtimi i një çështjeje konkrete kur:

- a) ka marrë pjesë në hartimin e aktit objekt shqyrtimi;
- b) ka deklaruar publikisht qëndrimin e tij ndaj çështjes;
- c) për shkak të lidhjeve fisnore apo lidhjeve të tjera me pjesëmarrësit në gjykim vihet në dyshim paanshmëria e tij;
- ç) paanshmëria e tij vihet në dyshim për shkaqe të tjera.

2. Kur objekt shqyrtimi është një ligj ose akt normativ, i cili mund të ketë efekte edhe për gjyqtarin e Gjykatës Kushtetuese, heqja dorë e tij ose kërkesa për përjashtim për këtë shkak nuk pranohet.

4. Në rastet e parashikuara në paragrafin 1 të këtij neni, gjyqtari, brenda një afati të arsyeshëm, i paraqet kërkesën me shkrim për heqjen dorë nga çështja Kryetarit të Gjykatës Kushtetuese. Kërkesa për heqje dorë ose për përjashtimin nga gjykimi shqyrtohet nga Mbledhja e Gjyqtarëve, e cila vendos për pranimin ose jo të saj.”

Neni 42

Neni 38 ndryshohet si vijon:

“Neni 38

Njoftimi, paraqitja e dokumenteve dhe pjesëmarrja në seancë plenare

1. Njoftimi për orën dhe datën e zhvillimit të seancës plenare, publike ose mbi bazë të dokumenteve, bëhet nga Drejtoria Gjyqësore e Gjykatës Kushtetuese, si rregull 30 ditë para datës së caktuar për zhvillimin e seancës plenare, me përjashtim të rasteve kur Gjykata Kushtetuese vendos ndryshe.

2. Njoftimi i kërkuarit, subjektit të interesuar ose përfaqësuesit të tyre, ose sipas rastit i dëshmitarit, ekspertit apo personave të tjerë pjesëmarrja e të cilëve është e nevojshme për zhvillimin efektiv të gjykimit kushtetues, bëhet me shkresë zyrtare, me fletë-thirrje postare, me telegram si dhe përmes e-mailit nëse palët kanë rënë dakord për këtë mënyrë njoftimi në momentin e depozitimit të kërkesës pranë Gjykatës Kushtetuese.

3. Kur ndonjëri nga pjesëmarrësit në gjykimin kushtetues nuk ka një vendqëndrim të saktë ose ndodhet me qëndrim të përhershëm jashtë shtetit, njoftimi bëhet me letërporosi, sipas rregullave të Kodit të Procedurës Civile dhe

me shpallje në selinë e Gjykatës Kushtetuese, të paktën 30 ditë përpara datës së caktuar për zhvillimin e seancës plenare.

4. Mosnjoftimi i rregullt shkakton shtyrjen e seancës plenare, duke caktuar një datë tjetër për zhvillimin e saj, si dhe duke bërë njoftimet përkatëse.

5. Kur kërkuesi, subjekti i interesuar ose përfaqësuesit e tyre, megjithëse janë njoftuar, nuk paraqiten në seancë plenare ose nuk dërgojnë dokumente shtesë, seanca plenare zhvillohet në mungesë.

6. Kur seanca zhvillohet mbi bazë dokumentesh mosparaqitja brenda afatit të përcaktuar dhe pa shkaqe të përligjura e parashtrimeve nga kërkuesi dhe i prapësimeve nga subjekti/et e interesuara pasjell zhvillimin e gjykimit vetëm mbi bazën e kërkesës dhe/ose dokumenteve shoqëruese të saj të paraqitura në momentin e regjistrimit.”

Neni 43

Në Nenin 42 ndryshohet titulli dhe shtohet paragrafi i parë me përmbajtje si vijon:

“Neni 42

Kërkimi i dokumenteve dhe detyrimi për t'i paraqitur ato

1. Çdo organ shtetëror, person fizik ose juridik, ka detyrimin t'i vërë në dispozicion Gjykatës Kushtetuese dokumente, të dhëna e njoftime kur këto kërkohen e çmohen të nevojshme për shqyrtimin e çështjes.”

Neni 44

Pas Nenit 43 shtohet Neni 43/a me këtë përmbajtje:

“Neni 43/a

Procedura gjatë zhvillimit të seancës publike

1. Personat e pranishëm në sallën e gjyqit duhet të respektojnë solemnitetin e Gjykatës. Ata duhet t'i binden kërkesave të Kryesuesit të seancës për mbajtjen e qetësisë.

2. Kur gjyqtarët hyjnë ose dalin nga salla e gjyqit dhe kur shpallet një vendim ose përfundim i Gjykatës Kushtetuese, personat e pranishëm në sallë gjyqit ngrihen në këmbë. Pjesëmarrësit në proces qëndrojnë në këmbë kur i drejtohen trupit gjykues.

3. Avokatët dhe prokurorët mbajnë uniformën përkatëse në sallën e gjyqit, ndërsa pjesëmarrësit e tjerë respektojnë etikën në veshje. Kryesuesi i seancës

në rast të mosrespektimit të rregullave tërheq vëmendjendhe në rast të përsëritjes i propozon trupit gjykues vendosjen e masave administrative, sipas parashikimeve në Rregulloren e Brendshme të Gjykatës Kushtetuese.

4. Mbarëvajtja e seancës gjyqësore garantohet nga një punonjës i Gjykatës. Kërkesat e tij për ruajtjen e rendit ose për zbatimin e udhëzimeve të Kryesuesit të seancës janë të detyrueshme për të gjithë pjesëmarrësit në proces.

Neni 45

Pas Nenit 43/a shtohet Neni 43/b me këtë përmbajtje:

“Neni 43/b

Të drejtat e pjesëmarrësve në seancë gjyqësore

1. Pjesëmarrësit në procesin e gjyimit para Gjykatës Kushtetuese kanë këto të drejta:

- a) të njihen me dokumentet e dosjes, të marrin ekstrakte ose fotokopje të tyre;
- b) të marrin pjesë në shqyrtimin e provave;
- c) të paraqesin prova;
- ç) t'i drejtojnë pyetje njëri-tjetrit, dëshmitarëve, ekspertëve e specialistëve;
- d) të paraqesin kërkesapara Gjykatës Kushtetuese;
- dh) të japin shpjegime me shkrim ose me gojë;
- e) të paraqesin përfundimet e tyre;
- ë) të kundërshtojnë kërkesat e palëve të tjera, përfundimet dhe shpjegimet e tyre, si dhe të paraqesin pretendime përfundimtare.

2. Kërkuesi, në çdo fazë të procesit deri në marrjen e vendimit nga Gjykata Kushtetuese, mund të kërkojë më shkrim pakësimin dhe shtimin e objektit të kërkimit oseheqjen dorë nga kërkesa.”

Neni 46

Pas Nenit 44 shtohet Neni 44/a me këtë përmbajtje:

“Neni 44/a

Shtyrja e seancës

Gjykata mund të shtyjë shqyrtimin e çështjes nëse ajo e vlerëson të nevojshme paraqitjen e dëshmitarëve dhe të ekspertëve të fushës, marrjen e provavetë

tjera, hetimin e mëtejshëm të çështjes ose formimin e plotë të trupit gjykues. Shqyrtimi i çështjes rifillon nga momenti i ndërprerjes.”

Neni 47

Pas Nenit 44/a shtohet Neni 44/b me këtë përmbajtje:

“Neni 44/b

Pezullimi i gjykimit

1. Nëse Gjykata Kushtetuese gjatë shqyrtimit të çështjes vendos të kërkojë një opinion këshillimor nga GJEDNJ-ja lidhur me zbatimin e të drejtave dhe lirive të parashikuara nga KEDNJ-ja dhe protokolleve shtesë të sajose të kërkojë *amicus curia* nga organizma të tjerë, ajo vendos pezullimin e shqyrtimit të çështjes.
2. Seanca rihapet menjëherë pas marrjes së opinionit këshillimor nga GJEDNJ-ja ose *amicus curia*. Opinioni i marrë u njoftohet palëve bashkë me datën e seancës.”

Neni 48

Në nenin 45 bëhen këto ndryshime:

Ndryshohet titulli me këtë përmbajtje: “Pezullimi i ligjit ose aktit”

Pas paragrafit 4, shtohet paragrafi 5 me këtë përmbajtje:

“5. Vendimi i Gjykatës Kushtetuese në çdo rast jepet i arsyetuar dhe publikohet menjëherë.”

Neni 49

Neni 46shfuqizohet.

Neni 50

Neni 47 ndryshohet si vijon:

“Neni 47

Afati i shqyrtimit të çështjes

1. Shqyrtimi i çështjeve nga Kolegjet ose Mbledhja e Gjyqtarëve përfundon brenda 3 muajve nga paraqitja e kërkesës, me përjashtim të rasteve kur ky ligj përcakton afate të tjera. Në çdo rast bisedimet dhe marrja e vendimit nga Kolegjet ose Mbledhja e Gjyqtarëve bëhet mbi bazën e projektvendimit të përgatitur nga relatori.
2. Shqyrtimi i çështjes në seancë plenare bëhet pasi të jenë depozituar paraprakisht nga palët të gjitha materialet e nevojshme për gjykim si dhe çështja të jetë përgatitur në tërësi nga relatori i çështjes duke përfshirë dhe projektvendimit përkatës. Relatori i çështjes paraqet në bisedime projektvendimin përkatës, mbi të cilin votojnë të gjithë gjyqtarët që kanë marrë pjesë në votim.
3. Vendimi përfundimtar shpallet i arsyetuar jo më vonë se 1 muaj nga përfundimi i seancës, me përjashtim të rasteve kur parashikohet ndryshe në këtë ligj.”

Neni 51

Neni 49 ndryshohet si vijon:

“Neni 49

Subjektet që vënë në lëvizje Gjykatën Kushtetuese

1. Të drejtën për të vënë në lëvizje Gjykatën Kushtetuese për pajtueshmërinë eligjit ose të akteve të tjera normative me Kushtetutën ose me marrëveshjet ndërkombëtare e kanë: Presidenti i Republikës, Kryeministri, jo më pak se një e pesta e deputetëve dhe Avokati i Popullit.
2. Të drejtën për të vënë në lëvizje Gjykatën Kushtetuese për kontrollin vetëm të respektimit të procedurës së parashikuar nga Kushtetuta sipas nenit 177 dhe nenit 131 paragrafi 2 të Kushtetutës kanë Presidenti i Republikës dhe jo më pak se një e pesta e deputetëve.
3. Të drejtën për të filluar një kontroll mbi pajtueshmërinë e ligjit ose akteve të tjera normative me Kushtetutën ose marrëveshjet ndërkombëtare e kanë edhe:
 - a) Kryetari i Kontrollit të Lartë të Shtetit;
 - b) organet e qeverisjes vendore, kur pretendojnë se u janë cenuar të drejtat e tyre të parashikuara në Kushtetutë ose pozita e tyre kushtetuese;
 - c) komisionerët e krijuar me ligj për mbrojtjen e të drejtave themelore të njeriut, kur gjatë veprimtarisë së tyre konstatojnë se ligji ose akti normativ cenon të drejtat dhe liritë themelore të individëve;
 - ç) KLGJ dhe KLP, kur pretendojnë se ligji ose akti normativ cenon veprimtarinë kushtetuese të tyre ose pozitën juridike të gjyqtarëve dhe të prokurorëve;

d) organet e bashkësive fetare, partitë politike, organizatat, kur pretendojnë se ligji ose akti normativ cenon veprimtarinë e tyre dhe të drejtat dhe liritë e anëtarëve të tyre.

dh) gjykatat e të gjitha niveleve, kur gjatë gjykimit të një çështjeje konstatojnë se ligji ose aktet normative bien ndesh me Kushtetutën ose marrëveshjet ndërkombëtare;

e) individët, kur pretendojnë se u cenohen në mënyrë të drejtpërdrejt dhe reale të drejtat dhe liritë e tyre të parashikuara në Kushtetutë, pasi të kenë shteruar të gjitha mjetet juridike për këtë qëllim si dhe kur akti që kundërshtojnë është drejtpërdrejt i zbatueshëm dhe nuk parashikon nxjerrjen e akteve nënligjore për zbatimin e tij.

3. Subjektet e parashikuara në pikën 2 në çdo rast duhet të provojnë se çështja lidhet drejtpërdrejt me të drejtat dhe liritë e parashikuara nga Kushtetuta ose me qëllimet e veprimtarisë së tyre.”

Neni 52

Neni 50 ndryshohet si vijon:

“Neni 50

Afati i paraqitjes së kërkesës

1. Kërkesat në Gjykatën Kushtetuese për pajtueshmërinë e ligjit ose të akteve të tjera normative me Kushtetutën ose me marrëveshjet ndërkombëtare të ratifikuara, sipas nenit 49, pika 1 dhe 3 shkronjat a), b), c), ç) dhe d) mund të paraqiten brenda 2 vjetëve nga hyrja në fuqi e aktit.

2. Kërkesat për kushtetutshmërinë e ligjit për rishikimin e Kushtetutës, në aspektin procedural, mund të paraqiten 60 ditë nga hyrja në fuqi e ligjit.

3. Gjykatat mund ta paraqesin kërkesën në çdo kohë kur gjatë shqyrtimit të një çështjeje gjyqësore konkrete, sipas nenit 145/2 të Kushtetutës, çmojnë antikushtetutshmërinë e ligjit ose të aktit normativ.

4. Individët mund të paraqesin kërkesë për papajtueshmërinë e ligjit ose të akteve të tjera normative me Kushtetutën ose me marrëveshjet ndërkombëtare të ratifikuara brenda 4 muajve nga konstatimi i cenimit.”

Neni 53

Në Nenin 51, pas paragrafit 1, shtohet paragrafi 2 me këtë përmbajtje:

“2.Kur një ligj ose akt normativ ose pjesë të tij që janë objekt shqyrtimi para Gjykatës Kushtetuese shfuqizohen ose ndryshohen para se Gjykata Kushtetuese të marrë vendim, gjykimi pushohet, me përjashtim të rasteve kur ajo çmon se gjykimi duhet të vazhdojë për shkak të një interesi publik ose shtetëror.”

Neni 54

Pas Nenit 51 shtohet Neni 51/a me këtë përmbajtje:

“Neni 51/a

Vendimmarrja eGjykatës Kushtetuese

1. Gjykata Kushtetuese pas shqyrtimit të çështjes vendos:
 - a) Rrëzimin e kërkesës;
 - b) Pranimin tërësisht ose pjesërisht të kërkesës dhe shfuqizimin e ligjit ose aktit normativ;
2. Në çdo rast Gjykata Kushtetuese në dispozitivin e vendimit shprehet edhe për efektin e vendimit dhe pasojat e tij.”

Neni 55

Në nenin 52 bëhen këto ndryshime:

Paragrafi 2 ndryshon si vijon:

“2. Gjykata Kushtetuese vihet në lëvizje për shqyrtimin e këtyre çështjeve vetëm pasi bëhet kërkesë nga subjektet e parashikuara në nenin 134 shkronjat “a”, “b”, “c”, “ç” e “dh” të Kushtetutës, si dhe nga subjektet e parashikuara në shkronjat “d”, “e”, “ë” “f” “g” “gj”, “h” e “i” të Kushtetutës, për çështje që lidhen me interesat e tyre.

Në paragrafin 3, fjalia e dytë ndryshon si vijon:

“Shqyrtimi i kërkesës përfundon brenda 3 muajve nga data e paraqitjes së saj.”

Neni 56

Pas Nenit 52 shtohet Neni 52/a me këtë përmbajtje:

“Neni 52/a

Vendimmarrja e Gjykatës Kushtetuese

1. Gjykata Kushtetuese pas shqyrtimit të çështjes vendos:
 - a) Deklarimin e marrëveshjes ndërkombëtare në pajtim me Kushtetutën dhe lejimin e ratifikimit të saj nga Kuvendi
 - b) Deklarimin e marrëveshjes ndërkombëtare të papajtueshme me Kushtetutën dhe ndalimin e ratifikimit të saj nga Kuvendi.
2. Vendimi i Gjykatës Kushtetuese u njoftohet menjëherë Presidentit, Kuvendit dhe Këshillit të Ministrave dhe dërgohet për publikim në Fletore Zyrtare.”

Neni 57

Në Nenin 53 shtohet titulli me këtë përmbajtje:

“Marrëveshjet ndërkombëtare të miratuara para hyrjes në fuqi të Kushtetutës.”

Neni 58

Në Nenin 57 bëhen këto ndryshime:

Shtohet titulli i nenit “Subjektet kërkuese”

Në paragrafin 1, pas togfjalëshit “jo më pak se një të pestës së deputetëve” shtohet “të Avokatit të Popullit dhe të Kryetarit të Kontrollit të Lartë të Shtetit.”

Neni 59

Në nenin 58 shtohet titulli i Nenit “Kufijtë e shqyrtimit.”

Neni 60

Në nenin 60 shtohet titulli i Nenit me këtë përmbajtje:

“Vendimarrja e Gjykatës Kushtetuese.”

Neni 61

Në nenin 61 shtohet titulli i Nenit me këtë përmbajtje:

“Vënia në lëvizje e Gjykatës Kushtetuese.”

Neni 62

Neni 62 ndryshohet si vijon:

“Neni 62

Zhvillimi i seancës

1. Gjykata Kushtetuese për kalimin e çështjes në seancë plenare vendos me shumicën e anëtarëve të saj. Në këtë rast zhvillohet seancë plenare publike.
2. Në seancën plenare ftohet të marrë pjesë Presidenti i Republikës, i cili mund të përfaqësohet nga një mbrojtës i zgjedhur prej tij, si edhe Kuvendi. Gjykata Kushtetuese vendos sipas rastit të thërrasë edhe persona të tjerë në gjykim.
3. Mungesa në seancën plenare e Presidentit të Republikës ose përfaqësuesit të tij pa një shkak të arsyeshëm nuk përbën shkak për moszhvillimin e gjykimit.”

Neni 63

Neni 63 ndryshohet si vijon:

“Neni 63

Vendimmarrja e Gjykatës Kushtetuese

1. Kur Gjykata Kushtetuese arrin në përfundimin se Presidenti i Republikës ka shkelur rëndë Kushtetutën ose ka kryer një krim të rëndë, deklaron shkarkimin e tij nga detyra. Në këtë rast vendimi i Gjykatës Kushtetuese hyn në fuqi ditën e shpalljes dhe botohet menjëherë në Fletoren Zyrtare.
2. Kur Gjykata Kushtetuese nuk arrin në përfundimin se Presidenti i Republikës ka shkelur rëndë Kushtetutën ose ka kryer një krim të rëndë, ajo vendos shfuqizimin e vendimit të Kuvendit të Shqipërisë
3. Dorëheqja e Presidentit të Republikës nga detyra ose përfundimi i mandatit të tij si President i Republikës, pas fillimit të shqyrtimit të çështjes nga Gjykata Kushtetuese, nuk përbën shkak për pushimin e gjykimit të çështjes.
4. Kur vendoset deklarimi i shkarkimit nga detyra i Presidentit të Republikës, ai nuk përfiton asnjë nga trajtimet e veçanta të parashikuara për funksionarët e lartë.
5. Rregullat e përcaktuara në nenin 61 pikat 1, 2 dhe 3 zbatohen edhe në rastin e vërtetimit përfundimtar të faktit të pamundësisë së përhershmenë ushtrimit detyrës nga Presidenti i Republikës. Në këtë rast, Gjykata Kushtetuese vendos vërtetimin e faktit të pamundësisë për ushtrimin e detyrës ose rrëzon vendimin e Kuvendit të Shqipërisë, kur ajo nuk e gjen të bazuar.”

Neni 64

Në Nenin 64 shtohet titulli dhe ndryshohet paragrafi 1 dhe 2 si vijon:

“Neni 64

Shqyrtimi i çështjes

1. Për çështjet që lidhen me zgjedhjen, zgjedhshmërinë e Presidentit të Republikës dhe për papajtueshmëritë në ushtrimin e funksioneve të tij, Gjykata Kushtetuese vihet në lëvizje me kërkesë të jo më pak se një të pestës së deputetëve ose të partive politike.
2. Në rastet që lidhen me procedurën e zgjedhjes dhe zgjedhshmërisë, Gjykata Kushtetuese vendos shfuqizimin e vendimit të Kuvendit të Shqipërisë ose rrezimin e kërkesës.”

Neni 65

Neni 65 shfuqizohet.

Neni 66

Neni 66 ndryshohet si vijon:

“Neni 66

Subjektet kërkuese

1. Për shqyrtimin e zgjedhshmërisë së deputetëve, Gjykata Kushtetuese vihet në lëvizje me kërkesë të Presidentit të Republikës, të jo më pak se 1/5 së deputetëve të Kuvendit, ose të partive politike.
2. Për shqyrtimin e papajtueshmërisë në ushtrimin e funksioneve të deputetëve, Gjykata Kushtetuese vihet në lëvizje me kërkesë të Kuvendit të Republikës së Shqipërisë ose të një të pestës së deputetëve.
3. Gjykata Kushtetuese verifikon zgjedhjen e deputetëve me kërkesë të partisë politike ose të kandidatit për deputet të pavarur, duke zbatuar në këtë rast edhe dispozitat ligjore për zgjedhjet e përgjithshme.”

Neni 67

Pas Nenit 66 shtohet Neni 66/a me këtë përmbajtje:

“Neni 66/a

Afatet e kërkesës

1. Kërkesa për shqyrtimin e zgjedhshmërisë së deputetëve paraqitet në Gjykatën Kushtetuese brenda 3 muajve nga konstatimi i faktit të pazgjedhshmërisë.
2. Kërkesa për papajtueshmëri të funksionit të deputetit mund të paraqitet në Gjykatën Kushtetuese përse kohë vazhdon mandati i deputetit, por jo më vonë se 6 muaj para përfundimit të mandatit dhe jo më vonë se 3 muaj nga konstatimi i papajtueshmërisë.
3. Gjykata Kushtetuese në këto raste përfundon shqyrtimin e çështjes brenda 60 ditëve nga paraqitja e kërkesës.”

Neni 68

Në nenin 67 shtohet titulli i Nenit me këtë përmbajtje:

“Vendimmarrja e Gjykatës Kushtetuese.”

Neni 69

Pas nenit 67 shtohen neni 67/a me këtë përmbajtje:

“Neni 67/a

Subjektet kërkuese

1. Kuvendi i Shqipërisë, kur ndodhet në kushtet e nenit 177 të Kushtetutës, i drejtohet Gjykatës Kushtetuese për verifikimin paraprak të kushtetutshmërisë së çështjes së shtruar për referendum.
2. Gjykata Kushtetuese vendos brenda 60 ditëve nga paraqitja e kërkesës.

Neni 69

Pas nenit 67/a shtohen neni 67/b me këtë përmbajtje:

“Neni 67/b

Shqyrtimi i çështjes

1. Gjatë shqyrtimit të kushtetutshmërisë së çështjeve të shtruara për referendum, Gjykata Kushtetuese vlerëson vlefshmërinë formale dhe materiale të çështjes së

shtruar për referendum, si dhe procedurën e vendimmarrjes për zhvillimin e një referendum, në rastin e nismës nga Kuvendi.

2. Gjkata Kushtetuese nuk mund të kontrollojë rëndësinë e çështjeve të veçanta apo kushtetueshmërinë e aktit që do t'i nënshtrohet referendumit.”

Neni 70

Pas nenit 67/b shtohen neni 67/c me këtë përmbajtje:

“Neni 67/c

Vendimmarrja e Gjykatës Kushtetuese

1. Në përfundim të shqyrtimit gjyqësor, Gjykata Kushtetuese vendos:

a) deklarin si të pajtueshme me Kushtetutën të çështjes së shtruar për referendum dhe lejimin e zhvillimit të referendumit;

b) deklarin si të papajtueshme me Kushtetutën të çështjes së shtruar për referendum.

2. Në kushtet kur gjen zbatim shkronja b) e këtij neni, referendumi nuk zhvillohet.”

Neni 71

Shtohet titulli “Procedura për verifikimin e rezultateve të referendumit”

Pas nenit 67/c shtohen neni 67/ç me këtë përmbajtje:

“Neni 67/ç

Vënia në lëvizje e Gjykatës Kushtetuese

1. Brenda 10 ditëve nga shpallja e rezultatit përfundimtar të referendumit, grupi nismëtar për zhvillimin e referendumit, ose subjektet e parashikuara në nenin 134 shkronjat e), ë) dhe f) të Kushtetutës, kur çështja lidhet me interesat e tyre, kanë të drejtë të kërkojnë verifikimin e këtij rezultati nga Gjykata Kushtetuese.

2. Gjykata Kushtetuese jep vendim brenda 1muaji nga paraqitja e kërkesës. Në raste të veçanta Gjykata Kushtetuese mund të vendosë shtyrjen e afatit deri në 1 muaj.”

Neni 72

Pas nenit 67/ç shtohen neni 67/d me këtë përmbajtje:

**“Neni 67/d
Shqyrtimi i çështjes**

1. Gjykata Kushtetuese shqyrton bazueshmërinë e pretendimeve të natyrës kushtetuese dhe që kanë të bëjnë me ushtrimin e të drejtës së votës nga shtetasit që kanë marrë pjesë në referendum, vlefshmërinë e procesit referendar si dhe procesin e shpalljes së rezultatit të referendumit.
2. Kur Gjykata Kushtetuese vlerëson si të nevojshëm rinumërimine votave, ajo urdhëron Komisionin Qendror të Zgjedhjeve për të kryer një procedurë të tillë.
3. Pas kryerjes së procedurës sipas pikës 2, Komisioni Qendror i Zgjedhjeve i njofton rezultatin Gjykatës Kushtetuese.”

Neni 73

Pas nenit 67/d shtohen neni 67/dh me këtë përmbajtje:

**“Neni 67/dh
Vendimmarrja e Gjykatës Kushtetuese**

1. Në përfundim të shqyrtimit gjyqësor, Gjykata Kushtetuese vendos:
 - a) rrëzimin e kërkesës dhe lënien në fuqi të rezultatit përfundimtar të referendumit;
 - b) shfuqizimin e vendimit të Komisionit Qëndror të Zgjedhjeve dhe deklarimin e ligjit si të miratuar ose të shfuqizuar;
 - c) shfuqizimin e vendimit të Komisionit Qëndror të Zgjedhjeve dhe deklarimin e çështjessë rëndësisë së veçantë si të miratuar ose jo;
 - ç) përsëritjen e referendumit.”

Neni 74

Në nenin 68 shtohet titulli i Nenit me këtë përmbajtje:

“Vënia në lëvizje e Gjykatës Kushtetuese.”

Neni 75

Në nenin 69 shtohet titulli i Nenit me këtë përmbajtje:

“Shqyrtimi i çështjes.”

Neni 76

Neni 70 ndryshohet si vijon:

“Neni 70

Vendimmarrja e Gjykatës Kushtetuese

1. Gjykata Kushtetuese, gjatë shqyrtimit të çështjeve të parashikuara në nenet 68 e 69 të këtij ligji dhe për arsye që kanë të bëjnë me kushtetutshmërinë e një ligji konkret, publikon faktin se çështja është duke u shqyrtuar prej saj.
2. Kur çështja e sjellë nga Gjykata e Lartë kalon për gjykim në seancë plenare, gjykatat e tjera pezullojnë çështjet në gjykim, për të cilat gjen zbatim ligji i kundërshtuar në Gjykatën Kushtetuese.
3. Në rastet kur Gjykata Kushtetuese e shfuqizon ligjin si antikushtetues, vendimin e saj ia njofton Kuvendit dhe Këshillit të Ministrave.”

Neni 77

Pas Nenit 70 shtohet titulli me këtë përmbajtje: “Procedura për shqyrtimin e ankimit kushtetues individual.”

Pas titullit shtohet shtohet Neni 71 me këtë përmbajtje:

“Neni 71

E drejta për të ushtruar ankimin kushtetues individual

1. Çdo individ, person fizik ose juridik, subjekt i së drejtës private dhe publike, kur është palë në një proces ligjor ose kur është bartës i të drejtave dhe lirive themelore të parashikuara nga Kushtetuta ka të drejtë të kundërshtojë para Gjykatës Kushtetuese çdo akt që cenon të drejtat dhe liritë e parashikuara në Kushtetutë, sipas kriterëve të parashikuara në nenin 71/a.
2. Objekt i ankimit kushtetues individual, në raste të veçanta, mund të jetë edhe ligji ose akti normativ, sipas nenit 49/2 të këtij ligji.
3. Gjykata Kushtetuese shqyrton përfundimisht ankimet kundër vendimeve të Këshillit të Lartë Gjyqësor dhe të Këshillit të Lartë të Prokurorisë, sipas nenit 140 dhe 148/d të Kushtetutës.

Neni 78

Pas Nenit 70 shtohet neni 70/a me këtë përmbajtje:

“Neni 71/a

Kriteret për të ushtruar ankim kushtetues individual

1. Ankimi kushtetues individual shqyrtohet nga Gjykata Kushtetuese kur:
 - a) Kërkuesi ka shteruar të gjitha mjetet juridike efektive para se t'i drejtohet Gjykatës Kushtetuese ose kur kuadri ligjor i brendshëm nuk parashikon mjete juridike efektive në dispozicion;
 - b) Kërkesa paraqitet brenda afatit 4 mujor nga konstatimi i cenimit;
 - c) Pasojat negative të pretenduara janë të drejtpërdrejta dhe reale për kërkuesin.
 - ç) shqyrtimi i çështjes nga Gjykata Kushtetuese do të mund të rivendoste në vend të drejtën e shkelur të individit.
2. Përveç kriterëve të parashikuaranë pikën 1 të këtij neni, gjejnë zbatim rregullimet e parashikuara në këtë ligj, për shqyrtimin paraprak.”

Neni 79

Pas Nenit 70/a shtohet neni 70/b me këtë përmbajtje:

“Neni 71/b

Shqyrtimi nga Gjykata Kushtetuese

1. Gjykata Kushtetuese shqyrton nëse akti, pjesërisht ose tërësisht, është në përputhje me Kushtetutën dhe marrëveshjet ndërkombëtare të ratifikuara. Gjykata Kushtetuese mund të shprehet edhe për dispozita të tjera që nuk janë objekt i kërkesës, nëse çmon se kanë lidhje me çështjen në gjykim.
2. Kur Gjykata Kushtetuese shqyrton kushtetutshmërinë e një akti dhe arrin në përfundimin se ai bazohet mbi një ligj ose akt normativ antikushtetues, Gjykata vendos njëkohësisht edhe shfuqizimin e ligjit ose aktit normativ.
3. Në rastet kur gjen zbatim pika 2 e këtij neni, efektet e vendimit të Gjykatës Kushtetuese nuk shtrihen ndaj akteve që kanë përfunduar efektet ose vendimeve gjyqësore që kanë marrë formë të prerë, përveç rastit të parashikuar në nenin 51/a paragrafi 3 i këtij ligji.
4. Gjykata Kushtetuese e shqyrton kërkesën brenda një afati të arsyeshëm.”

Neni 80

Pas Nenit 71/b shtohet neni 71/c me këtë përmbajtje:

“Neni 71/c

Detyrimet që rrjedhin nga vendimmarrja e Gjykatave Ndërkombëtare

1. Për qëllimet e këtij ligji, Gjykatat Ndërkombëtare janë ato gjykata, juridiksioni i të cilave shtrihet ndaj shtetit shqiptar, si pasojë e detyrimeve që rrjedhin nga marrëveshjet ndërkombëtare të ratifikuara.
2. Nëse një gjykatë ndërkombëtare konstaton se Republika e Shqipërisë ka shkelur detyrimin që rrjedh nga një marrëveshje ndërkombëtare dhe si rrjedhojë janë cenuar të drejtat dhe liritë themelore të një personi fizik ose juridik nëpërmjet një ligji ose akti normativ, Gjykata Kushtetuese, me kërkesë, mund të shfuqizojë ligjin ose aktin normativ nëse konstaton se nuk ka mjet tjetër për të vënë në vend të drejtat e cenuara.
3. Nëse Gjykata Kushtetuese ka vendosur më parë mbi një çështje, e cila është gjykuar nga një gjykatë ndërkombëtare dhe kjo e fundit ka konstatuar se janë cenuar të drejtat dhe liritë themelore të individit, si rrjedhojë e vendimit të Gjykatës Kushtetuese, subjekti i cenuar, në favor të të cilit ka vendosur gjykata ndërkombëtare ka të drejtë t'i drejtohet me kërkesë Gjykatës Kushtetuese për rihapje të procesit gjyqësor.
4. Kërkesa për rihapje të procesit para Gjykatës Kushtetuese paraqitet brenda 4 muajve nga hyrja në fuqi e vendimit të gjykatës ndërkombëtare. Ajo duhet të përmbajë një përmbledhje të vendimit të gjykatës ndërkombëtare me pikat kryesore të konstatimeve që ka bërë ajo gjykatë si dhe kërkimet konkrete. Kërkuesi duhet të kërkojë shprehimisht rihapjen e procesit dhe shfuqizimin e aktit.
5. Kërkesa për rihapje të procesit nuk pranohet nëse:
 - a) pasojat e cenimit të të drejtave dhe lirive themelore nuk ekzistojnë më;
 - b) gjykata ndërkombëtare ka dhënë një dëmshpërblim, pa e shoqëruar me rihapje të procesit (*just satisfaction*);
 - c) cenimi është mënjeluar nga një rregullim i ri ligjor ose forma të tjera.
6. Gjykata Kushtetuese, kur pranon kërkesën, vendos:
 - a) shfuqizimin e vendimit të mëparshëm të saj dhe pranimin e kërkesës;
 - b) shfuqizimin e vendimit të mëparshëm të saj dhe njëkohësisht të aktit që ka cenuar të drejtat dhe liritë themelore të kërkuesit dhe detyrimin e organit kompetent të nxjerrë një akt të ri ose detyrimin e organit të mosveprojë, sipas rastit.”

Neni 81

Pas Nenit 71/c shtohet neni 71/ç me këtë përmbajtje:

“Neni 71/ç

Shqyrtimi i kërkesave për tejzgjatje të procesit para Gjykatës Kushtetuese

1. Kushdo që është palë në një proces që zhvillohet para Gjykatës Kushtetuese ose palë në një proces gjyqësor të pezulluar si rrjedhojë e një kontrolli incidental ose shqyrtimi të kushtetutshmërisë së ligjit të inicuar nga subjekte të tjera të parashikuara në nenin 134 të Kushtetutës, dhe pretendon se gjykimi është zhvilluar tej afatit të arsyeshëm, ka të drejtë të kërkojë shpërblim të drejtë nga Gjykata Kushtetuese, nëse konstatohet se nga tejzgjatja e procesit atij i janë cenuar të drejtat dhe liritë e tij të parashikuara nga Kushtetuta.
2. Në çdo rast, pavarësisht pasojave, kërkuesi nuk mund të paraqesë kërkesë pa kaluar të paktën një vit nga fillimi i shqyrtimit të çështjes.
3. Gjykata Kushtetuese në çdo rast vlerëson natyrën e procesit dhe të çështjes, si dhe rrethanat që kanë ndikuar në procesin vendimmarrës të Gjykatës Kushtetuese. Ajo vendos për masën e dëmshpërblimit, duke iu referuar pasojave që i kanë ardhur kërkuetit nga tejzgjatja e procesit para saj.
4. Nëse Gjykata Kushtetuese arrin në përfundimin se gjykimi është zgjatur tej afatit, pa shkak të arsyeshëm, atëherë ajo dëmshpërblen kërkuetin deri në masën 100.000 lekë për çdo vit vonesë.”

Neni 82

Pas Nenit 71/ç shtohet neni 71/d me këtë përmbajtje:

“Neni 71/d

Shqyrtimi i kërkesave sipas nenit 179/a të Kushtetutës

1. Gjykata Kushtetuese, me kërkesë të jo më pak se 1/5 së deputetëve të Kuvendit të Shqipërisë, shqyrton rastet e parashikuara nga neni 179/a të Kushtetutës si dhe nga ligji nr.138/2015 “Për garantimin e integritetit të personave që zgjidhen, emërohen ose ushtrojnë funksione publike.”
2. Gjykata Kushtetuese në këtë rast shqyrton nëse ndodhet në kushtet emosveprimit të organevetë ngarkuara nga Kushtetuta apo ligji për konstatimin e mbarimit apo pavlefshmërisë së mandatit, ose shkarkimin nga detyra të zyrtarit të zgjedhur, të emëruar apo funksionarit të lartë publik.
3. Gjykata Kushtetuese në fund të shqyrtimit vendos:
 - a) Rrëzimin e kërkesës;
 - b) Konstatimin e mbarimit apo pavlefshmërisë së mandatit, ose shkarkimin nga detyra të funksionarit të lartë publik.”

Neni 83

Neni 72, paragrafi 6, ndryshohet si vijon:

“6. Vendimi i Gjykatës Kushtetuese duhet të shpallet i arsyetuar. Në raste të veçanta që kanë të bëjnë me çështje të rëndësisë publike, Gjykata Kushtetuese mund të njoftojë dispozitivin e vendimit menjëherë pas marrjes së tij dhe shtyn shpalljen e vendimit të arsyetuar deri në 30 ditë. Në këtë rast, vendimi hyn në fuqi ditën e shpalljes së tij bashkë me arsyetimin, përveç rasteve kur Gjykata vendos ndryshe.”²

Neni 84

Në Nenin 73, pas paragrafit 3, shtohet paragrafi 4 me këtë përmbajtje:

“4. Kur gjatë votimit nuk formohet shumica prej 5gjyqtarësh, kërkesa konsiderohet e rrëzuar.”

Neni 85

Neni 74 shfuqizohet.

Neni 86

Neni 76 ndryshohet si vijon:

“Neni 76

Efektet juridike të vendimeve të Gjykatës Kushtetuese

1. Vendimi i Gjykatës Kushtetuese janë përfundimtare dhe të detyrueshme për zbatim.
2. Vendimi i Gjykatës Kushtetuese që ka shfuqizuar një ligj apo akt normativ si të papajtueshëm me Kushtetutën ose me marrëveshjet ndërkombëtare, si rregull sjell efekte juridike nga data e hyrjes së tij në fuqi, përveç rasteve të parashikuara ndryshe nga ky ligj.

²Ka edhe një opinion ndryshe që të mos parashikohet si përjashtim, por për çdo rast vendim i i Gjykatës Kushtetuese të shpallet i arsyetuar.

3. Gjykata Kushtetuese, në çdo rast, shprehet edhe për efektet e vendimit të saj.
4. Gjykata Kushtetuese mund të vendosë që vendimi për shfuqizimin e një akti të prodhojë pasoja në një datë tjetër të ndryshme nga hyrja e tij në fuqi. Në këtë rast Kuvendi apo çdo institucion tjetër duhet të bëjë ndryshimet e nevojshme brenda afatit të përcaktuar në vendimin e Gjykatës Kushtetuese dhe në përputhje me pjesën arsyetuese të tij.
5. Kur Gjykata Kushtetuese gjatë shqyrtimit të një çështje konstaton se ka boshllëk ligjor si rrjedhojë e të cilit kanë ardhur pasoja negative për të drejtat dhe liritë themelore të individit, ajo, veç të tjerave, vendos detyrimin e ligjvënësit për të plotësuar kuadrin ligjor brenda një afati të caktuar.
6. Vendimet e gjykatave të çdo shkalle, të cilat shfuqizohen nga Gjykata Kushtetuese, nuk kanë fuqi juridike nga momenti i marrjes së tyre. Çështja i dërgohet për shqyrtim gjykatës, vendimi i të cilës është shfuqizuar.
7. Vendimi ka fuqi prapavepruese vetëm:
 - a) ndaj një dënimi penal edhe gjatë kohës që është në ekzekutim, nëse ai lidhet drejtpërdrejt me zbatimin e ligjit ose të aktit normativ të shfuqizuar;
 - b) ndaj çështjeve që shqyrtohen nga gjykatat, derisa vendimet e tyre nuk janë përfundimtare dhe të formës së prerë;
 - ç) ndaj pasojave ende të pazezuarara të ligjit apo aktit normativ të shfuqizuar.”

Neni 87

Neni 77 shfuqizohet.

Neni 88

Neni 79shfuqizohet.

Neni 89

Neni 80 ndryshohet si vijon:

“Neni 80

Saktësimi dhe plotësimi i vendimit

1. Gjykata Kushtetuese ka të drejtë, me kërkesë, të ndreqë gabimet në shkrim, në llogari ose ndonjë pasaktësi të dukshme të lejuar në vendim, pa ndryshuar thelbin e vendimmarrjes, brenda 2 muajve nga shpallja e vendimit.
2. Pas shqyrtimit të këtyre rasteve, Gjykata Kushtetuese merr vendim i cili publikohet në Fletoren Zyrtare, sipas parashikimeve të këtij ligji.”

Neni 90

Në Nenin 81, paragrafët 3 dhe 4 ndryshohen si vijon:

“Neni 81

Ekzekutimi i vendimeve

3.Gjykata Kushtetuese në varësi të llojit të vendimit si dhe kur është e nevojshme, mund të caktojë në pjesën urdhëruese, organin e ngarkuar me zbatimin e vendimit, si dhe mënyrën e ekzekutimit, duke caktuar afate konkrete, mënyrën dhe procedurën përkatëse të ekzekutimit.

4.Moszbatimi ose pengimi i ekzekutimit të vendimit të Gjykatës Kushtetuese dënohet sipas dispozitave përkatëse të Kodit Penal.”

Neni 91

Neni 82, Neni 83, Neni 84 dhe Neni 85 shfuqizohen.

Neni 92

Neni 86 ndryshon si vijon:

“Neni 86

Zbatimi i ligjit të ri

1. Shqyrtimi i shkeljeve disiplinore të gjyqtarëve të Gjykatës Kushtetuese, sipas nenit 10 të këtij ligji, për një periudhë 9 vjeçare nga hyrja në fuqi e këtij ligji, do të bëhet nga Kolegji i Apelit pranë Gjykatës Kushtetuese, sipas parashikimeve të ligjit nr.__datë__”Për rivlerësimin kalimtar të gjyqtarëve dhe prokurorëve në Republikën e Shqipërisë.”.

2. Këshilltarët ligjorë që janë emëruar para hyrjes në fuqi të këtij ligji vazhdojnë të qëndrojnë në detyrë, pasi të kenë përfunduar me sukses procesin e rivlerësimit kalimtar, sipas nenit 179/b dhe Aneksit të Kushtetutës si dhe ligjit nr.__datë__Për rivlerësimin kalimtar të gjyqtarëve dhe prokurorëve në Republikën e Shqipërisë.

3. Për kërkesat dhe çështjet që janë në shqyrtim datën e hyrjes në fuqi të këtij ligji, do të zbatohen dispozitat e këtij ligji, me përjashtim të rasteve të parashikuara në nenet 50 paragrafi 3, 71, 71/a, 71/b, 71/c dhe 71/ç për të cilat do të fillojë zbatimi në datën 1 janar 2017.”

Neni 93

Hyrja në fuqi e ligjit

Ky ligj hyn në fuqi 15 ditë pas botimit në Fletoren Zyrtare